

冲庵顧先生撫遼奏議

冲菴顧先生撫遼奏議卷之五

通州 益卿顧養謙著

疏

議處遼鎮兵餉 圖說附

題為極危孤鎮邊長虜衆兵寡餉薄恭

進圖說懇乞

聖明御覽

特賜宸斷以遺久安事竊惟禦虜之策惟戰與守而
已其機在知彼知已其本在足兵足食未有兵
食不足而可以審彼已之機者也未有兵食不

足不可以審彼已而可以談戰守之策者也臣
自奉

命撫遼待罪行間者且一年所矣中間賴將士之力
雖有一二出塞之功不敢遂用為喜而憂思轉
深則以遼左處勢之危真有若累卵然者未可
以一二戰取勝而高枕也臣乃會同總督薊遼
保定等處軍務兼理糧餉都察院右都御史兼
兵部右侍郎王 巡按山東監察御史王國
弼日夜與大帥及司道諸臣辨地形偵虜勢核
軍實計資糧而知遼事之難其大勢有四則邊

長虜衆兵寡餉薄是也夫遼西起山海東盡寬
莫延袤二千餘里而三岔河中流入海分遼地
為河東西河東西之間舊遼陽之南廣可四百
里入內地可三百五十里為虜畜牧往來之地
而我則紆迴夾河為塞以守蓋二千餘里之間
無險可恃無障可乘無處不可入犯雖有城堡
相去動數十里而遠有警則藉營兵分防猶然
不足雖有墩臺不過瞭望軍丁數人傳報烽火
而已雖有壕塼蹠之可頽而填也零賊往往疾
馳出入若飄風驟雨不可為備何況大虜蓋自

山海以西恃天險修守稱腹裏一出關門若置
遼地於度外矣遼實無邊也臣故不得已而曰
邊長直寧前錦義有朶顏衛諸酋之虜直廣寧
遼瀋有泰寧衛諸酋之虜直開原有福餘衛諸
酋之虜三衛之虜合之可十餘萬騎小掠則各
有分地大舉則聚衆於兩河之間或聲東擊西
或東西並犯自山海以東直抵開原小大城堡
無不擊刁斗戒嚴而三衛之酋北合土蠻西合
青酋則其勢愈大殆不下百萬騎矣蓋九邊以
貢市撫守並得羈縻制禦之策而西虜北虜與三

衛之虜無不東向而甘心於遼虜譬則黃河之水諸邊譬則堤防而以遼為壑也此遼之所以獨當其難而受害獨甚也凡此皆韃靼部也開原之東則有海西酋王台之子率其衆萬餘騎牧近邊至今賴以明耳目而為我藩籬其東南撫順靉陽寬奠之間則有建州之虜可三萬餘衆陽若順而陰為賊然多步少騎勢不與三衛西北諸酋合而為患小此皆女直之遺種所謂東夷者也以全遼而言東備東夷而西若三衛西北之虜置東夷勿論即三衛西北之虜稱百

萬矣臣故曰虜衆計全遼馬步官軍舊額之數凡十一萬五千四百六十一員名內驛遞軍九千六百餘名及歷年兵荒逃故官軍一萬六千二百一十四員名實在止八萬九千六百餘員名而中間步居十四有馬稱騎者止五萬一千九百餘耳中惟大將所統萬衆稱強次寧前兵又次河東兵其三萬餘皆廝養傭奴也即舉全遼之士一當大虜業無不以一當十矣而况散之於二千餘里之間二十二城一百五堡十四驛之內無所不守無所不分無所不寡乎廣寧

鎮城撫鎮二臣及督餉分巡諸臣之所居全遼倚為重者也官兵止一萬四千二百有奇耳騎僅萬餘聞警則分防於六城二十七堡六驛之內急則東西應援奔走兩河之間無事則發邊工作一歲之中得解甲釋畚而還顧其家者大都不兩月耳遼兵視他鎮兵最苦而鎮城之兵其苦又最遼兵遼陽城者按臣及分守協守諸臣之所居也為河以東重地兵不滿五千騎強半聞警則分防於四城三十八堡二驛之內急則南援海州北援開原間亦工作寧前兵備與

一叅將提兵僅二千餘人騎十七居寧遠援五城二十一堡五驛而寧前一道去邊遠者不二十里近不十里勢最單危而工作苦開原兵備與一叅將提兵三千人騎強半居開原援四城十有九堡當遼地盡最孤苑馬寺居蓋州蓋州稱腹裏故無兵自嘉靖間虜乘冬月河水數大舉深入踰海蓋破熊岳堡掠復金以南海島間為禍甚烈蓋復之間始騷然議兵矣然不過取金復蓋三衛修邊之夫五千七百有奇更名土兵而以兩閑將統之春散而耕冬聚而防防蓋

復以南四城十二驛堡之地將不稟於部議兵不隸於尺籍餉不給於公帑至今徒有其名耳雖謂之無兵可也南衛在遼尚稱殷富其民居渙散虜知故道數垂涎而其城堡往往卑薄難於為守此最可憂其他叅遊凡十員分布河東西要害間提兵或二千有奇或不盈二千以守所分地不足守備備禦各有專城之責者凡二十員惟前屯城中左所兵皆千餘畿陽城西平堡皆近千其他多不過六七百人少僅二百人或僅足守其城或守其城不足而仰給於大

營至諸堡驛之兵多不過三四百人少至三四
十人此其人第可供奔走備作耳不獨不能戰
亦難於守其勢不得不分營兵以守此遼左兵
馬之大較也臣往在薊時聞寧前有警嘗恠廣
寧之兵不即西援而不知寧前近虜而遠廣寧
倉卒勢不相及且彼亦各有分防非坐而視寧
前急也正營兵寡而分防不及寧前也即遼師
徃徃竒捷非以衆勝也則大帥仗

皇上之威靈而善用寡用竒乏故也非其勢均而力
相敵也夫敵有以一師一軍與敵者有以一郡

國與敵者有舉

中國而與為敵者西北之虜自古舉

中國而與為敵者也前代無論自

國朝來財盡東南力盡西北事無有大於禦虜者
矣今諸邊修其堤防而遼為虜壑欲以區區彈
丸之遼數萬之衆而敵自古及今以

中國與敵之虜也臣故曰兵寡乃若遼左軍餉之
薄盖有從矣先年三衛屬夷為我藩籬北虜隔
在絕漠而斥堠遠東夷弱而効順遼人得深耕
沃土而米穀賤民間為市米一石值銀二錢五

分故官給軍餉亦以銀二錢五分抵一石是時外無虜憂內有恒業物產甚盛人民繁庶一人應軍舉族為佐佐之貲財足給其父母妻子卒歲而有餘是以軍無鋒敵死亡之慮徵調修守之勞而有俯仰無累之樂人樂從軍而視月餉猶之竒羨而非所急也故米一石領銀二錢五分而足也自嘉靖二十五年屬夷合西北之虜大舉入犯大得志以去其後大小入犯歲無寧月為禍日深又水旱厲疫相仍人民殺虜死徙十去七八田野荒蕪米價騰湧軍伍凋耗生男

悉以應軍軍鮮次丁為佐而獨倚月餉月餉米一石給銀二錢五分而銀二錢五分不足糴米三斗以之資身不足終不能顧父母妻子矣是以逃亡益衆而勾捕橫及之端無窮蓋三十年來遼幾不可為矣

皇上御極以來兩

俞撫臣之

請漸加月餉已至四錢正兵營與各營家丁舊食雙糧五錢者七千餘人已加至六錢五分近年遼士漸有生氣而猶可支者

皇上之

恩也諸將士咸願效死而屢有戰功者感

息而思以報也是

皇上全遼而遺有今日也使非漸加之餉則其困苦
流離又不知當作何狀矣而臣猶不免以餉為
言者則請為

皇上細陳之夫全遼之軍月餉率四錢歲賞率九錢
河西多事馬勞歲給料八月月給銀一錢八分
河東以虜不數犯稱次衝馬歲給料六月而皆
無草惟廣寧四衛老哨諸軍之馬料八月如河

西例而給草四月月給銀一錢五分此所謂主
兵也主兵征調出百里外人馬得支行糧日三
分而遇賊對敵者全支遠戍者半支或以乏餉
則不與矣凡曰家丁者勁卒之稱也主將欲得
其死力而親厚之如其家之人者曰頭目者
率衆而勇敢登先者也正兵管及各營家丁頭
目共七千一百四十八名每名月支主兵糧銀
六錢五分客兵馬料銀六錢五分一人一馬月
支銀一兩三錢征調出百里外人得支行糧日
一分五釐或半支或不與而馬則不復有行料

矣外自錦義及河以東調入大營合操者謂之
選鋒軍糧賞各於其衛如例支主兵餉而以遠
調故人馬月支行糧料草銀九錢併月餉亦一
兩三錢征調雖適千里無行糧此所謂客兵也
而廣寧四衛軍亦有選克家丁者謂之軍家丁
以其為主兵也糧賞各如例從其衛而馬料草
亦從河西馬例不得多墩軍夜不收處極衝或
出入虜地旦暮死生不可測者凡四千三百九
十餘名月餉止五錢賞如例其次衝者二千四
百二十餘名糧賞悉與諸軍等並以主兵餉給

之然先是以兵部歲發馬價銀五萬兩不足買
補陣失倒死馬匹而扣全遼兵馬糧料十分之
一凡六萬七千八百七十五兩買補槽下倒死
之馬謂之朋銀則家丁頭目除扣朋銀外月實
領銀一兩一錢七分人馬各得銀五錢八分五
釐耳選鋒軍除正糧外月實領行糧八錢一分
人馬各得銀四錢五釐耳諸月餉四錢者實止
領銀三錢六分馬料一錢八分者實止銀一錢
六分二釐馬草一錢五分者實止銀一錢三分
五釐而給料八月六月者其餘月分皆無料草

矣此遼左主客兵馬糧芻之大較也今以遼左糧芻計之歲登米賤一石價可四五錢稍貴可六七錢家丁月餉五錢八分五釐止足糴米一石或一石五斗而邊人善食每盡一升即儉而日盡一升有父母妻子五口之家止足供二十日或一月之食而魚鹽蔬菜之費薪水之勞不與焉若歲歉米貴一石價輒一兩月餉五錢八分尚不足三口之家一月之食而况少而為三錢六分者乎遼左馬最勞而正營之馬特甚人倚馬為命飼之不得不勤一日一夜非豆三

升草三束不飽不可以騁官驗其飼馬法法甚峻而豆三升草三束賤則價止三分貴則常至五分是飼馬一月九錢尚恐不給家丁之五錢八分五釐豈所以飼戰馬而况減而為四錢五釐又減而為一錢六分二釐一錢三分五釐者乎又益減而為止支料八月六月者乎臣初出關時見帶甲護行之士皆取潢汙之水和麥麩而啜之以充饑渴而馬則不廢芻豆為之墮淚及抵鎮城詢之全遼之士皆然以為固常而淚不勝其墮矣查得南直隸浙江閩廣之間自兵

興以來月餉皆以九錢夫彼皆米穀布縷魚鹽所從出之鄉猶必餉以九錢而始足薊鎮南兵則以遠戍而厚招之月餉以一兩五錢不一兩五錢亦不足其招募步兵密雲灤陽漢莊凡三營九千人者月餉皆一兩軍餉上半年折色七錢下半年四錢五分馬料折色或八錢或四錢宣大軍餉沿邊八錢腹裏亦七錢其馬料折支亦至八錢七錢五月六月仍有貼料銀三錢緣先年宣大虜患頻仍軍士苦戰故養之為獨厚今遼左虜患甚於先年之宣大乃月餉止及其

半而飼馬不及兩鎮四分之一是遼兵之苦視諸鎮獨甚而其餉視諸鎮為獨薄也臣故曰餉薄然邊長矣而二千餘里之間又無險可修而守即薊鎮恃天險修守計二千里之內天險十七當修者才十三耳而發

內帑之財悉主客之兵十八九年之間修所當修者曾不能十二三蓋其難也若遼則二千里平坡沙磧之間又河流漫漶欲修何從也不獨詘於財力妨於虜警而圖其所不成是猶驅石而填海也臣故不敢議修邊宣大以西虜皆款

貢故撫賞互市有厚利以結其心得勝筭而虜不敢叛剽鎮虜皆屬夷撫賞如故外有重險內有重兵虜勢盛而虜不敢窺然其納

貢乞賞入市也各有分地分虜邊臣得制之故歲費各有額而不得過若遼則既無重險厚利如諸邊而虜之衆則蟻也而以賞招之是招寇也勢必不飽不飽必滋禍是猶委肉而當餓虎之蹊也臣故不敢議撫虜至於兵而稱寡其當增也明矣先是督臣亦嘗議全遼增兵一萬一千歲增糧賞銀七萬五千九百兩馬價二十二

兩矣而不報今方欲為全遼加餉請而又欲加
增兵之餉至七萬五千九百兩恐不能並得之
主計之臣臣且不敢議增兵夫與其益衆而不
飽也不如飽其寡之可以有為與其衆而不飽
之易於逃亡也不如飽其不逃者以為招來之
地則餉之薄也遼左今日之急急於然眉臣實
不得已而議加餉方欲畫圖貼說間隨准兵部
咨為遵奉

聖諭陳言政要以備

采擇事諉本部題稱

內閣輔臣傳奉

聖諭朕見連日天氣昏濁塵霾蔽空又覽臺官所奏
主百姓流離朕甚憂惶驚懼書云民惟邦本本
固邦寧又云民無常懷懷於有仁古人之言甚
有裨於為治君民一體憂樂相闕其害甚大惟
今之政固善亦有妨害民生者不少著各諫有
司明白條具奏請定奪庶以仰回

天意以遂民生朕與卿等共享太平之治卿等傳示
知悉欽此諫本部謹以職掌所關者推廣

德意條列奏

聞等因奉

聖旨卿等所奏有裨戎政邊務遼鎮兵餉著會同戶部議擬來說其餘俱依議行卿等務奉公率屬以回

天意欽此欽遵備咨前來煩照本部題奉

明旨內事理欽遵查照施行計開一議兵餉以保危鎮內稱遼東一鎮乃薊門之藩籬也遼危則薊受其敵密邇

陵京關係尤重先年虜不內侵人得耕種糧銀雖薄米價甚賤可以度日數年以來虜犯無時人少

田荒節蒙

湛恩汪濊漸加至四錢矣又以戰馬無措內除五分
為朋銀是每軍每月僅得三錢五分耳米價騰
湧糴餐不飽又安望得其懽心而令之出死力
耶伏望

皇上軫念地方之孤危憐憫軍士之忠勇且如連年
禦虜萬死一生是征戰較之各鎮獨當其難而
糧餉較之各鎮反從其薄固是相沿舊制亦宜
破格議處合無仍行諛鎮督撫巡按衙門詳議
具奏

勅下戶部從長酌議量行增加至於朋銀應否扣除
本部通候議定之日另行酌處臣等言及至此
非不知

帑藏日詘主計甚難乃敢忘體

國之心以昧同舟之義但遼左之急危如累碁而
臣等之心欲治未病若窮苦日蹙士不用命萬
一全遼不守即

皇上傾

帑藏而救之無益矣等因到臣又據整飭金復海
蓋兵備管苑馬寺卿事山東布政使司右叅政

郝杰呈為乞賜議添將領以重責成事查萬曆七年該先任巡撫周都御史會議將金復蓋修邊夫一萬二千丁內摘撥六千改充土兵原編銀力二差俱准開豁令其三時務農一冬團練每年十月初調集次年二月內遣散而以閑住將領二員分統之一在蓋州一在復州諸訓練防禦貼守事宜非不責之專也但土兵乃烏合之衆而閑將非見任之官法令難行教練鮮實不過資役使充虛名耳夫習已因循之久而人無綢繆之謀虜有垂涎之心而我無扼吭之

策萬一南逞誤事非輕今查得海州雖設叅將一員而去金復甚遠調度難周金州雖設守備一員而兵馬全無將何展布且海州叅將有兵三千尚不敷分貼况金復之無兵乎夫兵家之道戰守二端今守無高堅之城戰無精銳之卒可不為之寒心哉合無於復州添設叅將一員盖州添設備禦一員專責訓練其營司兵馬冊查金州見在土兵一千五百餘名復州一千二百名共二千七百餘名復州除見在一千二百名外再將金州撥補八百名以足二千之數內

摘定有馬一千步軍一千隸將官訓練金州七
百名仍聽守備訓練而永寧監石河藥古等城
堡如遇有警即叅將督率金州守備分貼防守
盖州土兵三千名內選一千名摘定有馬三百
步軍七百屬備禦訓練而熊岳岫巖等處如遇
有警即聽海州叅將督率備禦分貼防守其餘
土兵二千名輪班應軍一年一更上班者在營
常操下班者照常防冬事寧歸業金州者屬復
州將領節制盖州者屬海州將領節制其中軍
千把總等官即於兩衛選用庶統有主將則號

令自齊隸有操司則訓練自實分有信地則修
守自專虜若南向首尾聯絡主兵可以固守客
兵可以應援此保障南衛之一策也失今不行
亟處恐別無善後之策矣及查金州營堡見在
食糧軍士頭目共一千七百一十五名內除全
支糧賞頭目七十名不議外有支半糧半賞軍
士一千六百四十五名先年每名月支本色米
五斗計筭抵折色銀止該一錢二分五釐季支
賞布半疋止折放穀六斗一升八合七勺五抄
計抵折色銀一錢叁釐一毫二絲五忽與各城

堡軍士每名月支折色銀四錢者相去遠甚似
應量增以養士氣欲加給本色但查軍有增補
倉無積餘每年坐放官吏旗軍糧料俸賞尚不
敷用焉能加給軍士耶合無將前項軍士每名
每月加支折色糧銀一錢二分五釐通前共二
錢五分每季加支折色賞銀一錢三釐一毫二
絲五忽通前共二錢六釐二毫五絲計筭一年
每軍該加銀一兩九錢一分二釐五毫共銀三
千一百四十六兩六分二釐五毫再照土兵既
改額軍糧料亦應議給每名月支折色糧銀二

錢五分季支賞銀二錢六釐二毫五絲冬季又
該花銀七分五釐計筭一年每軍該銀三兩九
錢計三千七百名共該銀一萬四千四百三十
兩馬一千三百匹除四衛原無草束每年每匹
該料六箇月該銀一兩八分共該銀一千四百
四兩與金州營堡加增總計糧賞馬料通共該
銀一萬八千九百八十兩六分二釐五毫相應
增入年例數內其各軍騎操馬匹即於

貢夷及未寧監孳牧馬內陸續俵給火器於官局
製造給領盔甲弓箭刀槍除見在外不敷者於

庫貯不堪數內改造給領止恐糧料當增年例
戶部不肯輕增然而南衛廢地已甚勢如累碁
若不破格早圖終成畫餅此職所以日夜籌心
而不敢不以請者伏乞念全遼根本之地為桑
土未雨之謀早為題

請則南衛有保障之望而東虜絕窺伺之心等因到
臣據此臣復會同總督右都御史王 巡按

御史王國弼議照遼左之困其來久矣其處勢
之難至於今極矣今諸邊宴然而遼左獨戰夾
河二千餘里之間無險可守而無處不守諸邊

皆春秋兩防而遼左四時無日夜不防虜衆動以數十萬計而我兵無不一當百財與力公私並困而城堡墩壕臺圍無一日不修諸邊餉視遼皆以倍遼視諸邊曾不能半而獨處其薄是以遼左士馬最勞且苦而鎮城之兵為尤甚然感

皇上之

恩守官府之法遵將帥之令自臣所目擊屢出塞獲捷以還則赴邊工作河東有急則又奔防於河東南來還則又分防於錦義寧前之間而不以

為勞部餉每以預借故不時至自冬徂春凡三四月不得餉至賣衣裳鬻子女寧枵腹以待而不以為怨臣以為遼左將士人人皆忠臣也每為之感念泣下矣

皇上每往返

山陵則

念昌平小民蠲其租護從軍士加之賞頃見風霾異常則

念百姓之流離今軍士困苦百姓流離宜莫有過於

遼左

皇上若

親視其狀而

憐其忠又不知

軫念當何如者是遼人之困

皇上有必

仁之心而臣不以其狀

聞者是不能將順

皇上之美而負邊疆之託也臣不敢也今照兵部所
陳大都謂遼餉既薄而以扣朋銀故益薄餉當
議加而朋銀當酌處叅政郝杰所議大都欲設

將練兵而稍加之餉以防南衛虜所垂涎之地而保遼左之腹心然加餉議朋之必不容已者非獨恤軍兵也實以培全遼之元氣也臣請以全遼受病之狀畧而言之軍士以餉薄不能生活則多逃逃則不得不捕捕而得之則不得不治以軍法臣固知逃之非得已也然法廢則逃益衆故每蹙額而治以軍法捕之不得則不得不勾其餘丁丁盡而無從勾補則不得不橫及他姓而擾害之端益無窮矣家丁原非額軍而以餉招之來者也餉薄而不足以招之不得不

僉報而簿籍之其在河東者以道遠故與為期
期二年滿聽其攀報而更番之而所攀報之人
若赴死地往往傾其家求脫或自斷其手足至
死不肯應年復一年展轉攀報而河以東殷實
有力之戶殆蕭然矣所以不能遽變此法者以
為不如此不足以繫在營家丁之心而用之也
然至於今極矣而其怨獨歸於鎮臣不知先年
以地方多事撫鎮二臣不得已會議行之亦不
知其流弊之至於此也今家丁必不可廢而攀
報又為大害欲已攀報則厚養家丁不可不亟

為之圖也遼左終歲征調馬日夜不得休死傷多而地產少故馬貴貴於關西十之四其值幾三十金乃得一戰馬次則二十金少亦十五六金以見在五萬二千馬計之歲每死傷十二三不啻萬馬故部發馬價五萬兩不足而扣朋銀六萬七千八百餘兩佐之然官給之價家丁馬二十兩選鋒軍十八兩隨征老哨與河東西各營馬或十五六兩或十二兩少至十兩遼左馬價至十兩者不堪隨操矣何復言戰然自家丁以下人馬並相依為命不得不市良馬馬不良

不中驗故官所給價復不足而私益之遼人謂之稍銀稍銀多至十餘金少亦數金已累及其族而猶可忍近以兵部加發馬價二萬兩免扣朋銀而槽下倒死之馬悉責軍士買補夫先是部發銀伍萬兩加之朋銀六萬七千八百兩有奇共十一萬七千八百兩有奇官給之不足而私猶有稍銀今部加銀二萬兩總之不過七萬兩視扣朋銀尚少銀四萬七千八百餘兩而欲以責之困苦之士也豈可得乎行之一年而軍士與其族人並鬻其妻子而不足以供一馬

者矣此凡有馬者之所寒心也夫軍逃則有勾
補之害家丁則有攀報之害買馬則有賠累之
害此其為害皆次骨行之不止是不待虜而自
盡之術也求其策則戶部加之軍餉如臣今之
所

請兵部加之馬價如遼向之所朋則害皆可去全遼
之元氣可漸復而戰守彼已之機宜可藉箸而
談矣

皇上念遼大臣體

國豈忍惜此小費而忘二千里封疆之大計哉至

於蓋復間設將練兵則以時異勢殊更有所不容已者今叅政郝杰之所議餉不過舉先年二錢五分之例而尚不敢比於今之四錢蓋以南衛視諸衝邊為有間且知所從出之難故不敢與諸軍槩而議加餉也然諸軍之餉亦未可以槩而加也廣寧家丁最勞苦而功最多月餉不敢比薊鎮南兵之一兩五錢亦不敢比募兵之一兩而願比之浙直之九錢不九錢必不足以養戰士馬料草不九錢亦必不足飼戰馬人馬月加銀五錢而免攀報有老病物故者自可招

而補之每名歲加銀六兩計見在併逃故應補之數共四千五百名歲應加銀二萬七千兩選鋒軍四千名功勞與家丁等以其得踐更也人馬月加銀三錢歲應加銀一萬四千四百兩其餘全鎮見在併逃故應補之數共九萬餘非不勞苦也顧不敢多

請以難計臣每名月止加銀一錢止得月餉五錢耳歲應加銀十萬八千兩南衛歲加練兵糧賞馬料銀一萬八千九百八十兩通共該銀一十六萬八千三百八十兩應發之戶部馬價則除部

發銀七萬兩外尚少朋銀四萬七千八百餘兩
之數應發之兵部使二部發之不能盡如其數
則遼左之困猶未可盡蘇也謹具圖說一冊恭
進伏乞

聖明睿覽念此極危孤鎮

勅下戶兵二部再加查議如果臣等所
請不謬如數

題覆及將蓋復間添將事宜一併查議更望

皇上獨斷加惠全遼以遺久安全遼幸甚臣等幸甚
再照邊臣之籌邊則重安危計臣之主計則量

出入各緣職以效其忠而要之皆

國事也其當同心體

國也明矣往見邊臣有所

請而不得輒以為計臣吝而不知主計之難則邊臣
過也計臣不念邊臣之苦而輒以危言議其後
且以為妄也計臣亦過然主計之難誠莫有過
於今日矣驟而加遼餉以十有六萬而欲其歲
常繼也豈不難之又難哉不別出一策而徒斤
斤守尺寸而較錙銖也遼終不能盡得之太倉
矣查得增發馬價二萬兩而免扣朋銀者蓋由

給事中張希臯增餉之請也。曾奉

旨欲將薊遼兩鎮錢糧通融酌處矣。臣先為薊州道副使，頗知其詳。即薊州一道所轄中協一區餉蓋至六十三萬矣。遼餉不過四十六萬，以全遼之餉不能比薊之一區，其為薄可知矣。然萬曆十二年屬臣任內稽核樽節，省中協餉至七萬。兩密雲永平二道所省亦各以萬計。總之可十餘萬。兩臣嘗議薊鎮衝邊之臺止用南兵五人，每新增一臺輒分舊臺之兵以守，而不復增兵。臺愈多則兵愈寡，不足以守，非計也。所不復增

兵者徒以餉難再加耳不知舉全薊而言歲增臺不過二三十座增兵不過百五十人費餉不過二千餘兩即歲增臺百座不過增兵五百人費餉九千兩以薊鎮一年之所省足以供十年增百臺之餉而有餘而况十年之間其所省又不知當幾何也又何必請益於額餉之外也今若仍遵

前旨通融似應以薊之所省計臺增兵給餉先足薊而後以其餘者濟遼之急或可得其半此一策也而不可常恃也夫主計大臣必有遠大之畫

以生全遼人而仰慰

皇上之

至念臣愚不知大計本非臣之所得言而以遼左之勢誠急萬不得已仰

天而呼故復陳此以備下體之採焉若馬價之增發則先是督臣嘗有增馬價二十二萬之議矣今之本兵大臣即前日之督臣也前之所議既如此彼而今之所陳又如此其於遼蓋有深憂矣增馬價如朋銀之數而免扣餉必有處也而無容臣之喋喋為也緣係極危孤鎮邊長虜衆兵寡

餉薄恭

進圖說懇乞

聖明御覽

特賜宸斷以遺久安事理未敢擅便為此具本謹題
請

旨

冲菴顧先生撫遼奏議卷之六

通州 益卿顧養謙著

疏

全鎮圖說

圖式

一全遼大勢河東屬分守開原苑馬寺三道地
廣而人稍多河西屬分巡寧前二道地
窄而人亦少河東地勢阨靡而處東北
河西地勢却縮而處西南舊為圖者第
以河為界而地形則東西相對者非今

改正

一總圖內河東西地形皆正向河西自山海至錦義以西北為邊廣寧城以正北為邊自廣寧鎮遠堡綠河而南至西寧堡以東為邊河東自海州東勝堡綠河而北歷遼瀋至開原鎮西堡以西為邊開原城以北為邊自開原至寬奠以南抵鴨綠江以東為邊

一總圖內城堡驛鋪馬市各有識凡堡驛鋪市皆方而扁不扁不能容其墩臺不能悉

載載其畧在分圖

一分圖則順邊為圖不復拘東西南北至開原
盡其東向者為正北南向者為正東象
地形宛轉明遼地盡也

一圖內青者為山綠者為水巨浸者為海連海
而界朝鮮者為江屈曲而相通者為河
瀦者為湖紅細而逶迤者為路方而大
者為鎮城其次為衛次為所為堡又次
為驛最小者為鋪圓而高者為墩為臺
起山海架山疊石為險而工未竟者為

大邊牆連大牆而東竟全遼之地勢低而色黃者為土邊牆自廣寧東一水橫斜踰三岔河屬東昌堡而止者為路河緣路河而黃者為堤堤高七八尺邊外如舍宇色雜而連絡布散於山谷之間者為虜帳諸各有識各象其形而城堡驛舖之內各識其官軍之舊額墩臺道里之大都

貢市

一外夷

貢道凡四朝鮮陪臣渡鴨綠江由江沿湯站入建州諸衛夷由撫順關入海西塔魯木衛諸夷由開原鎮北關入海西塔山衛諸夷由廣順關入

一諸夷馬市凡三其一在廣寧鎮靜堡鎮遠關朶顏三衛諸夷入市一在開原鎮北堡鎮北關一在開原慶雲堡新安關並海西諸夷入市市之馬牛皆有稅其酋長有小賞賞以段布酒肉之類取諸稅而足然亦有額不得過不費官帑而頗資

其馬為用非如諸邊之撫賞馬市也

海道

一遼故航海屬山東自金州旅順口達登州新河關計水程五百五十里而海中島嶼相望遠不過百餘里近數十里可泊舟避風濤故道具在海邊居人能屈指而計也先是諸生應試悉赴山東山東亦歲運花布給遼卒而貨財相通豐歉相濟遼人登人兩利之後以遼左亡命逃入海島中漸衆而數為盜又藏匿遼左

逃亡卒或殺之海中為害日甚撫臣奉
命設策悉招降其衆散之金復間使復其業焚燒島
中屋廬鑿舟塞井而沉其器具於海海
患平而設禁禁海不得通登遼遂絕自
萬曆二年迄今凡十有三年矣每歲九
月撫臣令金州守備稍發舟師搜島燒
荒以為常夫當時海島甫平不得不嚴
海禁今宜搜島燒荒如故事禁奸人不
得居島中而弛海禁使登遼相通有無
緩急豐歉相濟則濟邊之急務也第其

立法宜慎耳

路河

一自廣寧東二十里至海州東昌堡凡一百七
十里緣路濬河謂之路河其來舊矣初
海運由路河直達廣寧外禦虜馬內洩
瀦水而達於海軍民賴焉後海運罷而
河漸湮嘉靖四年撫臣張連䟽

請濬之四十二年撫臣王之誥復

請修之隆慶元年撫臣魏學魯又

請大修之增築河堤高廣畫一人馬通行其上而河

外護之稱便迄今凡二十年矣堤日頽
河日湮虜得乘隙入居人行旅皆患之
而內水無所洩輒潴為湖地不可耕軍
民無所給食久雨則斷炊烟而人皆魚
鱉如是者已五六年矣今宜大䟽築之
使遼陽之粟得達於廣寧而導其枝流
別出以入於海乃可外禦而內耕也

舊遼陽

一遼陽舊城在遼外廣寧開原之間自廣寧出
邊取道東北行可二百里至舊遼陽舊

遼陽東北行可三百里至開原自舊遼
陽東南行入兩河之間可三百五十里
地故肥饒漢唐間屬

中國然或得或失宋陷於遼金

國朝夾河為塞以守自廣寧至開原紆迴七百里
而虜牧其中馬肥則逞東北犯開原東
南犯廣寧中犯遼陽海州兩河城堡處
處受敵且從遼海間可南犯南衛我兵
疲於奔命虜處其逸我處其勞虜居其
利我居其害此遼左腹心之害也談邊

事者每抗顏而曰遼左之務無急於復
舊遼陽且謂廣寧由舊遼陽達開原止
三百里而緣河紆迴行至開原八百里
以八百里之守守三百里其難易得失
較然矣而外驅腹心之虜內據肥美之
地東西蔽兩河而南蔽南衛筭之上者
也此誠美談也則人人能言之也而不
知廣寧經舊遼陽至開原或言四百八
十里或言五百里則非三百里明矣即
今紆迴行亦不過七百里以七百里之

守守五百里亦不可謂不便而中間城堡驛鋪墩臺工作並舉夫役非十餘萬衆不可防護官軍非十餘萬衆不可所費

帑金非六七十萬不可其告成功非六七年不可而固知虜之所必爭也其每秋冬大舉而來也又安必我兵之勝負而晏然版築耶盡全遼之兵且不足以護版築則二千餘里之間將盡置之不防耶抑借兵於他鎮而給耶此其勢誠難矣先任

撫臣張學顏與鎮守總兵官李成梁嘗因閱邊侍郎汪道昆固邊疆之條而議之詳矣臣等今不敢輕議也俟善養士卒相機擊虜於兩河之間虜數失利去視此地為害而棄之不顧乃可漸圖之也而未易言也

邊長

一西自山海東至江沿邊長二千二百一十八里

一萬曆元年遼鎮建議奉

旨修築寧前大邊臺牆凡六年自錐子山臺起至管
家衝臺止修完牆凡七十里臺凡二十
六座以工大力訕巡按御史趙允升題
允罷役連大牆而東直抵江沿凡二千餘里之間皆
有壕牆為邊壕深廣不盈丈牆高或盈
丈或不盈丈而土多沙磧牆善頽頽則
塞壕零賊往往乘間入大虜益難禦而
不得不修修之者以大虜入必先毀牆
塞壕可少緩其衝突以便屯民趨避也
此則遼之邊也與無邊同非如薊之峻

嶺重關高墻大臺之險南北軍兵之衆可據而守也

一寧前道所屬自鐵場堡錐子山臺至榑木衝堡安靜臺邊長三百八里每十里或二十里一堡凡二十一堡每二三里一臺凡二百六十三臺臺軍多者四五名少者二三名以下各道皆然

一分巡道所屬自大興堡新徐家山臺至西寧堡西寧臺邊長五百三十六里或二三十里或六七十里一堡凡二十二堡或

二 三里一臺凡四百四十四臺

一 苑馬寺所屬自東昌堡鎮河臺至東勝堡一堵墻墩邊長四十五里凡二堡三十二臺

一 分守道所屬西邊自長靜堡夾河臺至十方寺死魚湖臺長三百五里每二三十里一堡凡一十一堡每二三里一臺凡一百五十六臺

一 開原道所屬自西邊丁字泊堡夏塔兒南空臺至東邊三岔兒堡小河口臺共長四

百九十里每二三十里一堡凡一十九堡每二三里一臺凡二百一十五臺

一分守道所屬東邊自會安堡河口臺至長奠堡江沿臺長五百三十四里或二三十里或四五十里一堡凡一十五堡或二三里或四五里一臺凡一百五十九臺

虜衆

北虜韃靼部

一直前屯有猱兔板峇兒兀六伯户孛只塔補汪打敗阿主户等酋約一萬五六千騎

在地名鹽場迤北游牧離邊二百餘里
土魯赤我苦倫塔補汪噶亥滿堵孛來
等酋約二萬五六千騎在地名哈老兀
速游牧離邊三百餘里歲勾西虜犯遼
一直寧前有董會阿只孛羅忽禿罕孛羅大等
酋約八千餘騎在寧遠迤北地名土兒
根游牧離邊二百餘里專難哈刺恩得
孛來堵戶莽巾班卜刺等酋約三萬餘
騎在地名可可火屯游牧東西聯絡往
來構結離邊三百餘里歲勾西虜犯遼

一直錦義有扯勞亥歹青宰桑花台吉逞急兒
把敗等酋約二萬二三千騎在地名卜
刺哈兔蒼子溝等處游牧離邊約三四
百里歲糾土蠻大為邊患

一直義州有黃台吉以兒鄧委正青把都兒那
木大等酋約十三四萬餘騎在地名黃
河迤北一帶游牧離邊約四五百里土
蠻卜言台住宰桑兀兒把哈土妹大委
正等酋約四十萬餘騎在地名鹽場金
線塔等處游牧離邊約六七百里歲結

聚大舉入犯

一直鎮夷大清等處有已剿速把亥子把禿兒
卜言谷花大孛兒敗土魯赤等酋約三
萬餘騎在地名額列東搭裨山等處遊
牧離邊約二三百里歲糾土蠻大舉為
廣寧遼瀋河東西大患

一直鎮靜等處有老撒土魯孛兒戶土累把兒
度哈卜寨等酋約二萬二三千騎在地
名得兒必等處遊牧離邊約二百餘里
歲糾土蠻大舉為廣寧遼瀋河東西大

患

一直鎮寧等處有炒花煖兔伯牙兒朶卜火勺
賴土累莽中等酋約三萬餘騎在地名
塔馬戶杜等處遊牧離邊約三四百里
歲糾土蠻大舉為廣寧遼瀋河東西大
患

一直平虜等處有卜兒愛額參得兒阿刺章土
力等酋約二萬餘騎在地名遼濱塔打
且荒一帶遊牧離邊約二三百里歲勾
土蠻大舉為河東大患

一直開原有恍惚太果各賽擺言大石堵措伯
得掄准不賴等酋約三萬餘騎在地名
打半毋倫一帶遊牧離邊約三百餘里
歲為開原患

一直開原有那言大都堵占赤者兒得石刺臣
兀把賽等酋約二萬餘騎在地名主六四
好來等處遊牧迤東聯海西夷人離邊
約三百餘里歲為開原患

東虜女直部

一開原東北有已剿逞加奴子卜寨歹商阿卜

孩阿伯木忽魯在地名野黑寨住已剽
仰加奴男納里孛羅金台失阿里麻撒必
秃等夷共約一萬餘騎在地名台住寨
住俱離邊八九十里今畏威貢市

一開原東北有已戮白虎赤孛同果子佛當哈
卜等夷約二千餘騎在威遠堡境外地
名火屯寨住離邊約七十餘里今畏威
貢市

一直開原東北有已故王台子猛骨孛羅康古
六爨台已故虎兒罕男歹商等夷約一

萬二千餘騎見在廣順關外地名哈塔寨住離邊四十餘里至今忠順不移

一開原東有王忽子大明哥張大官兒等夷約三千餘騎在松山寺伍堡邊外地名把兒好子等寨住離邊五六十里今貢市

一撫順關外有綽乞搜失羊舒長舒三非山章伏羊功等夷約八九千騎在地名土木河撒兒骨等住離邊約五六十里間有竊掠

一清河邊外有奴兒哈赤等夷約五千餘騎在

地名寧宮塔等寨住離邊約二百餘里
間有竊掠

一 豸陽邊外有鎖羅把羊等夷約四千餘騎在
地名董呆寨等處住離邊約百五十里
時有竊掠未為大害

一 寬奠邊外有王兀堂等夷約一萬五六千騎
在地名瓦里哈等寨住離邊約二三百
里今拓地扼險各夷畏服

兵寨

一 全遼馬步官軍家丁舊額一十一萬五千四

百六十一員名內除驛遞軍九千六百餘名及歷年逃故官軍一萬六千二百一十四員名外實在官軍家丁八萬九千六百四十七員名

一凡鎮城及衛所堡驛原額官軍之數載在各圖之內存其額以待清補也實在官軍之數載在總圖之首著其實以便稽查也實在徃徃失額其溢額者凡八堡驛乃各直省充發新軍量各地虛實緩急而分填之者也廣寧遊兵左營所以溢

額者以遊擊家丁新增火器火藥諸匠
及被虜回鄉無家可歸壯健而可為兵
者悉收左營食糧也前屯右屯慶雲三
備禦營所以溢額者各有家丁數十名
也廣寧之團山堡前屯之八里舖則舊
本無軍而新以充發填之者也然溢而
填者類無多不足補全遼失額之百二
三

一全遼驛遞非如腹裏之設流官驛丞大使其
馬匹錢糧亦非若腹裏之出於有司每

一驛設三百戶所曰馬驛曰遞運曰安
插各有百戶掌之皆世官通計驛軍凡
二千七百八十九名專備馬騾驢送迎
并治館穀遞運軍凡二千五百七十名
安插軍凡一千八百一名俱扛臺并置
養車牛遞送朝

貢朝鮮及海西建州諸夷各舖亦設有舖司百戶
所百戶掌之亦世官通計舖軍凡二千
五百二十六名專遞來往公文驛遞安
插舖軍俱有額田無稅而以田所入各

供其役故各軍不復有月餉歲止領賞
銀九錢俱不係馬步官軍操防之數驛
遞安插軍俱載在各驛之下舖軍不能
悉載共載其原額於各道官軍之下然
四所軍以死徙流亡失額者多存者第
十二三又水旱荒萊田無所入故支全
額軍之賞給存者佐其供役而困苦亦
甚矣今不敢聞於

皇上也撫按諸臣當自調停之耳

一偏僻驛遞凡十處原額驛軍三百四十四名

遞運軍二百九十四名安插軍一百名
皆有額田而無糧賞

一寧前道所屬各城堡實在官軍家丁一萬五
千四百六十員名外原額驛軍五百六
十名遞運軍五百六十名安插軍五百
六十名舖軍二百七十四名

前屯遊擊駐劄中後所本營實在官軍家丁
一千八百四十九員名所轄前屯一備
禦萬曆十六年四月內題將遊擊改為
中後所遊擊其備禦移駐中前所專聽

協守管轄

前屯備禦駐劄前屯衛本營實在官軍家丁一千一百五十五員名領前屯城并以下所堡驛九十八處邊長一百八十四里有警則遊擊備禦二營分兵為防急則廣寧大營分兵為援而寧遠有急則前屯遊擊領兵東為援萬曆十六年四月內題備禦移駐中前所專聽協守管轄其備禦營兵馬即聽協守統領仍撥協守營調操五百名與中前所原軍五

百名共一千俱付備禦統領操練

中前所提調營實在官軍五百一十六員
名萬曆十六年四月內題將本營官軍
付備禦統領

中後所提調營實在官軍四百九十二員
名

鐵場堡實在官軍一百一十五員名

永安堡實在官軍九十九員名

背陰障堡實在官軍二百一十四員名

三山營堡實在官軍一百六十一員名

平川營堡實在官軍一百五十八員名
瑞昌堡實在官軍一百七十五員名

高臺營堡實在官軍一百七十八員名
三道溝堡實在官軍一百九十三員名

新興營堡實在官軍一百五十三員名
錦川營堡實在官軍一百四十八員名
黑莊寨堡實在官軍二百九十四員名

八里舖填實千總官下新軍實在一百七
十三員名

高嶺驛填實千總官下新軍實在一百六

十八員名原額驛軍一百一十二名遞
運軍一百一十二名安插軍一百一十
二名自此以下各驛皆有堡以護居人
有警則各分兵為防

沙河驛原額驛軍一百一十二名遞運軍
一百一十二名安插軍一百一十二名
東關驛原額驛軍一百一十二名遞運軍
一百一十二名安插軍一百一十二名
右營遊擊營實在官軍家丁一千五百六十
八員名原係廣寧入衛薊鎮之兵今常

川駐劄前屯衛應援前屯東西萬曆十六年四月內題將右營遊擊改為西路協守副總兵分有信地仍節制寧前叅遊備禦

寧遠叅將駐劄寧遠衛本營實在官軍義兵家丁二千一百五十一員名所轄寧遠一備禦

寧遠備禦駐劄中左所本營實在官軍家丁一千八十六員名領寧遠城及中左所并以下所堡驛凡十五處邊長一百二

十四里有警則叅將備禦分兵為防急則廣寧大營兵為防援而前屯有急則寧遠叅將領兵西為援

中右所提調營實在官軍家丁五百一十三員名

仙靈寺堡實在官軍二百一十四員名
小團山堡實在官軍二百四十員名

興水縣堡實在官軍一百六十四員名
白塔谷堡實在官軍一百四十一員名
寨兒山堡實在官軍一百四十三員名

灰山堡實在官軍一百三十七員名

松山寺堡實在官軍一百八十四員名

沙河堡實在官軍二百二員名

長嶺山堡實在官軍一百四十九員名

椴木衝堡實在官軍二百一十二員名

曹莊驛填實千總官下官軍并擺堡馬軍

實在二百一十六員名原額驛軍一百

一十二名遞運軍一百一十二名安插

軍一百一十二名

連山驛填實千總官下官軍并擺堡馬軍

實在二百二十四員名原額驛軍一百一十二名遮運軍一百一十二名安插軍一百一十二名

領兵遊擊營實在官軍家丁一千六百七十五員名原係廣寧入衛薊鎮之兵今常川駐劄中右所應援寧遠東西此與右營遊擊兵俱常駐寧前者以寧前地逼虜而兵力單也然二營以入衛之故皆無信地而事掣肘宜令領兵遊擊與寧遠叅將右營遊擊與前屯遊擊各分地

而守急則相援乃便萬曆十六年四月
內題改為中右所遊擊分有信地

一分巡道所屬各城堡實在官軍家丁三萬三
千二百七十員名外原額驛軍一千一
百九名遞運軍八百九十六名安插軍
九百四十八名舖軍九百六名

廣寧正兵營實在官軍家丁一萬一千九百
四十員名有警則分防河東西卑弱城
堡急則援全遼全遼倚為重最驍勁而
勞苦獨甚

遊兵左營遊擊駐劄廣寧城實在官軍家丁
二千二百七員名有警則分防河西城
堡急則隨大營應援

廣寧備禦官駐劄廣寧城無兵馬領廣寧城
并以下堡驛凡四處無邊

廣寧城驛原額驛軍一百一十二名遞運
軍一百一十二名安插軍一百一十二
名

閭陽驛原額驛軍一百一十二名遞運軍
一百一十二名安插軍五十二名

壯鎮堡係腹裏無兵馬有警分兵為防

盤山驛原額驛軍一百一十二名遞運軍

一百一十二名安插軍一百一十二名

義州叅將駐劄義州城本營實在官軍家丁
一千九百四十八員名所轄義州一備

禦

義州備禦駐劄大清堡本營實在官軍家丁

三百二十一員名領義州城并以下堡

驛凡十一處邊長一百二十三里有警

則叅將營分兵為防不足則廣寧大營

分兵為防

義州城驛原額驛軍一百一十二名原無
設立遞運安插二所

大定堡實在官軍二百四十四員名
大安堡實在官軍二百九員名

大康堡實在官軍二百七十三員名

大平堡實在官軍三百三十四員名

大寧堡實在官軍二百九十五員名

大靜堡實在官軍三百二十三員名

大清堡實在官軍三百六十二員名

大順堡新修已完尚無填實官軍

戚家堡實在官軍一百九十三員名

牽馬嶺驛原額驛軍一百一十二名安插

軍一百一十二名原無設立遞運所

錦州遊擊駐劄錦州城本營實在官軍家丁

一千七百七十一員名所轄右屯一備

禦弁錦州等城堡驛凡十三處邊長九

十五里有警則分兵為防不足則廣寧

大營分兵為防

松山所提調營實在官軍三百三十四員

名

大凌河所提調營實在官軍三百三十三員名

大興堡實在官軍四百六員名

大福堡實在官軍三百九十一員名

大鎮堡實在官軍三百八十六員名

大勝堡實在官軍三百五十四員名

大茂堡實在官軍三百七十九員名

錦昌堡實在官軍二百三十二員名

小凌河驛擺堡馬軍并填實新軍實在一

百五十六名原額驛軍一百一名遞運
軍一百一十二名安插軍一百一十二
名

杏山驛原額驛軍一百一十二名遞運軍
一百一十二名安插軍一百一十二名

廣寧右屯備禦駐劄右屯衛本營實在官軍
家丁五百四十八員名領右屯城并以
下驛凡二處無邊在廣寧南稱腹裏而
廣寧東西邊皆近可徑達虜所垂涎

十三山驛原額驛軍一百一十二名遞運

軍一百一十二名安插軍一百一十二名

正安堡車營遊擊駐劄正安堡本營實在官軍家丁一千八百三員名所轄鎮靜一守備并正安以下凡九堡邊長二百八里

團山堡實在配軍一百四十六名

鎮靜守備駐劄鎮靜堡本營實在官軍家丁二百一十五員名督防朵顏二衛夷人入市領鎮靜以下凡七堡邊長二百八

里有警則遊擊分兵為防不足則廣寧
大營分兵為防

鎮夷堡實在官軍五百八十七員名

鎮邊堡實在官軍五百八十九員名

鎮靜堡實在官軍五百二十二員名

鎮安堡實在官軍四百七十四員名

鎮遠堡實在官軍四百九十三員名

鎮寧堡實在官軍四百五十九員名

鎮平堡創修未完

鎮武堡遊擊駐劄鎮武堡本營實在官軍家

丁二千二十員名所轄西平一備禦

西平備禦駐劄西平堡本營并本堡實在官
軍家丁九百一十八員名領西平并以
下凡五堡邊長一百一十里有警則遊
擊分兵為防不足則廣寧大營分兵為
防

西平堡沙嶺驛原額驛軍一百一十二名
遞運軍一百一十二名安插軍一百一
十二名

鎮武堡實在官軍二百八十八員名本堡

高平驛原額驛軍一百一十二名遞運軍一百一十二名安插軍一百一十二名

西興堡實在官軍二百七十九員名

西寧堡實在官軍三百三十員名

平洋橋堡實在官軍二百八員名

一苑馬寺所屬各城堡實在官軍家丁四千八

百八十九員名外原額驛軍二百二十

四名遞運軍二百二十四名安插軍一

百一十二名偏僻驛軍三百四十四名

述運軍二百九十四名安插軍一百名
舖軍六百七十八名

海蓋叅將駐劄海州城本營實在官軍家丁
一千八百八員名所轄海蓋一備禦

海蓋備禦駐劄東昌堡本營實在官軍家丁
六百三十三員名領海蓋二城并以下
堡驛凡九處邊長四十五里有警則叅
將分兵為防急則遼陽副總兵為援不
足則廣寧大營分兵防援

海州城驛原額驛軍一百一十二名述運

軍一百一十三名

東昌堡實在官軍三百五員名本堡牛莊
驛原額驛軍一百一十二名遞運軍一
百一十二名安插軍一百一十二名

東勝堡實在官軍三百八十一員名

耀州堡驛原額驛軍一百一十二名遞運
軍一百一十二名安插軍一百名無糧
賞

連邦谷堡係腹裏設守堡官一員無兵馬
蓋州城驛原額驛軍一十三名遞運軍二

十名無糧賞

熊岳驛原額驛軍一十九名遞運軍二十
二名無糧賞本驛係嘉靖四十年大虜
已破之堡今其中居民止五十九家堡
大難修而無與為守見議遷之饅頭山
可據險而守也

五十寨驛原額驛軍六十五名遞運軍四
十八名無糧賞

岫巖堡原設撫民通判一員以堡城未建
不可居居蓋州今有守堡官一員

永寧監係腹裏故無兵而城垣卑薄難於為守

金復守備駐劄金州衛本營實在官軍六百七十一員名領金州城并以下衛堡驛凡十二處無邊邊海官軍本以備倭倭不復能至而所憂在虜也

復州衛止住衛所官員其軍士悉調各營堡操防本城驛原額驛軍一十九名遞運軍一十名無糧賞

樂古驛原額驛軍二十四名遞運軍一十

八名無糧賞

石河驛原額驛軍二十四名遞運軍一十八名無糧賞

羊官堡止有守堡官一員無見在兵馬

鹽場堡止有守堡官一員無見在兵馬

金州城驛原額驛軍二十名遞運軍一十八名無糧賞

木場驛原額驛軍二十四名遞運軍一十八名無糧賞

旅順口堡實在官軍二百九十二員名本

堡驛原額驛軍二十四名遞運軍一十八名無糧賞

望海塌堡實在官軍一百三十二員名

紅紫堡實在官軍一百三十六員名

歸服堡實在官軍一百五十二員名

黃骨島堡實在官軍二百三十七員名

總巡墩空委官下守墩空軍士實在一百

四十二名

一萬曆七年撫臣議將金復蓋三衛修邊夫一

萬二千丁內摘撥五千七百一十五名

免其銀力二差改充土兵而以兩閑將
統之一在蓋州一在復州春散而耕冬
聚而防防蓋復以南四城十二驛堡之
地至於今因循日久懈弛為甚而將非
推選無事權兵無糧賞無固志緩急無
所賴之也

一今議復州添設叅將一員練兵二千名馬步
各半轄金州守備守備練兵七百名如
故共兵二千七百名分防永寧監石河
樂古諸城堡蓋州添設備禦一員練兵

一千名馬三步七屬海州叅將防岫巖
熊岳諸堡

一分守道所屬各城堡實在官軍家丁二萬二
千一百一十員名外原額驛軍四百四
十八名遞運軍四百四十二名安插軍
一百五十名舖軍四百七十一名

遼陽副總兵駐劄遼陽城本營實在官軍家
丁三千三百七十四員名有警則分防
河以東單弱城堡急則北援開原南援
海州而東備東夷然副總兵亦有分地

清河一守備長安長勇二備禦并遼陽城以下驛堡凡十七處邊長三百九十六里河西有急副總兵亦提兵西援而廣寧大營之兵每歲冬春之間輒分防河以東城堡自海州直抵開原

遼陽車營遊擊係管局都司兼管駐劄遼陽城本營實在官軍家丁一千四百五十三員名聽副總兵調度應接

遼陽城驛原額驛軍一百一十三名遞運軍一百九名

虎皮驛堡實在官軍四十四員名原額驛軍一百一十二名遞運軍一百一十一名安插軍五十一名

鞍山驛原額驛軍一百一十二名遞運軍一百一十一名安插軍九十九名

長安備禦駐劄長安堡本營并本堡實在官軍家丁三百七員名領長安并以下凡四堡邊長九十五里

長靜堡實在官軍一百六十九員名

長寧堡實在官軍三百一員名

長定堡實在官軍一百八十六員名

長勇備禦駐劄長勇堡本營并本堡實在官軍家丁五百八十九員名領長勇并以下凡三堡邊長七十里

長勝堡實在官軍二百八十九員名

武靖營堡實在官軍四十五員名

清河守備駐劄清河堡本營實在官軍家丁四百九十七員名領清河以下凡七堡邊長二百三十一里

馬根單堡實在官軍四百二員名

散羊谷堡實在官軍二百二十五員名

清河堡實在官軍五百一十員名

一堵牆堡實在官軍四百七十二員名

鱸場堡實在官軍二百九十四員名

孤山新堡實在官軍二百三十二員名

威寧營堡實在官軍一百二十七員名

腹裏煙墩委官下墩軍實在二百五十六

名

寬奠叅將駐劄寬奠堡本營實在官軍家丁

一千五百六十九員名所轄變陽一守

備長奠一備禦領寬奠以下凡十五堡
邊長二百五十八里急則副總兵兵為
援甚則廣寧大營兵為援

變陽守備駐劄變陽堡本營并本堡實在官
軍家丁九百九十八員名領變陽并以
下凡六堡邊長一百四十里有警則叅
將視緩急分兵為防

洒馬吉堡實在官軍一百六十五員名

新奠堡實在官軍三百一十七員名

草河堡實在官軍四十四員名

鎮夷堡實在官軍四十二員名

甜水站堡實在官軍一百五員名

長真備禦駐劄長真堡本營并本堡實在官

軍家丁四百四十一員名領長真并以

下九九堡邊長一百一十八里有警則

叅將視緩急分兵為防

寬奠堡實在官軍四百八十三員名

大奠堡實在官軍四百二十三員名

永奠堡實在官軍四百一十九員名

江沿堡實在官軍六十二員名

湯站堡實在官軍七十七員名

鳳凰城堡實在官軍六十八員名

鎮東堡實在官軍三十九員名

青台谷堡係腹裏設守堡官一員無兵馬

瀋陽遊擊駐劄瀋陽城本營實在官軍家丁

二千四百一十九員名所轄瀋陽蒲河

撫順三備禦領瀋陽城并以下城堡凡

十一處邊長一百八十五里急則副總

兵分兵防援不足則廣寧大營分兵防

援

瀋陽城驛原額驛軍一百一十一名遮運軍一百一十一名

奉集堡實在官軍九十五員名

瀋陽備禦駐劄平虜堡本營實在官軍家丁八百四十七員名領瀋陽城并以下堡凡四處邊長八十五里

長營堡實在官軍三百六十六員名

靜遠堡實在官軍二百四十三員名

平虜堡實在官軍一百九十五員名

蒲河備禦駐劄蒲河所本營實在官軍家丁

八百一十員名領蒲河所并以下堡凡
三處邊長五十五里

上榆林堡實在官軍二百四員名

十方寺堡實在官軍二百四十五員名

撫順備禦駐劄蒲河所本營實在官軍家丁
八百七員名領撫順所并以下堡凡三
處邊長四十五里

會安堡實在官軍二百八十七員名

東州堡實在官軍五百六十八員名

一開原道所屬各城堡實在官軍家丁一萬三

千九百一十八員名外原額驛軍四百四十八名遞運軍四百四十八名安插軍三十一名舖軍一百九十七名

鐵嶺遊擊駐劄鐵嶺衛本營實在官軍家丁二千九百三十六員名所轄鐵嶺懿路沅河三備禦領鐵嶺城并以下城堡凡十一處邊長一百九十里急則副總兵分兵防援不足則廣寧大營分兵防援鐵嶺備禦駐劄鎮西堡本營實在官軍家丁七百七十三員名領鐵嶺城并以下堡

凡五處邊長七十里

鐵嶺城噶州驛原額驛軍一百一十二名
遞運軍一百一十二名

曾遲堡實在官軍一百七十八員名
鎮西堡實在官軍二百四十二員名

殷家莊窠堡實在官軍四百五十九員名
撫安堡實在官軍一百二十二員名

懿路備禦駐劄懿路城本營實在官軍家丁
八百九十八員名領懿路城并以下堡
凡三處邊長七十里

懿路驛原額驛軍一百一十二名遞運軍

一百一十二名

丁字泊堡實在官軍三百五十八員名

三岔兒堡實在官軍二百九十五員名

汎河備禦駐劄汎河城本營實在官軍家丁

六百八十五員名領汎河城并以下堡

凡三處邊長五十里

宋家泊堡實在官軍一百九十二員名

白家衝堡實在官軍一百四十九員名

開原叅將駐劄開原城本營實在官軍家丁

二千九百四十七員名所轄開原中固
慶雲清陽四備禦領開原城并以下城
堡凡十三處邊長三百里有警則叅將
分兵為防急則副總兵兵為援甚則廣
寧大營兵為援

松山堡實在官軍二百七十五員名

靖安堡實在官軍二百七十五員名

威遠堡實在官軍一百八十一員名

開原備禦劄開原城無兵馬領開原城護
守城池并馬市撫夷

開原城驛原額驛軍一百一十二名遞運軍一百一十二名

中固備禦駐劄中固城本營實在官軍家丁五百一十九員名領中固城并以下堡九三處邊長六十五里

中固城沙河撫順驛原額驛軍一百一十二名遞運軍一百一十二名安插軍三十一名

定遠堡實在官軍二百一十二員名

柴河堡實在官軍一百四十一員名

慶雲備禦駐劄慶雲堡本營實在官軍家丁
五百七員名領慶雲以下凡三堡邊長
六十里

慶雲堡實在官軍三百四員名

古城堡實在官軍一百九十五員名

永寧堡實在官軍一百二十七員名

清陽備禦駐劄清陽堡本營實在官軍二百
八十七員名領清陽以下凡三堡邊長
八十里

鎮夷堡實在官軍二百五十員名

清陽堡實在官軍一百五十六員名
鎮北堡實在官軍二百五十五員名

餉簿

一 薊鎮南兵皆無馬月餉皆一兩五錢密雲灤
陽漢莊三營募兵皆無馬月餉皆一兩
全鎮軍餉上半年折色七錢下半年四
錢五分馬料折色或八錢或四錢宣大
軍餉沿邊八錢腹裏七錢馬料折色八
錢或七錢五月六月仍有貼料銀三錢
南直隸浙江閩廣兵餉皆九錢往歲浙

兵稍議減其餉輒激而至譁其撫臣賴
皇上命威望大臣出鎮之事乃定夫浙兵本以備倭
倭乘風泛海來歷殊險其來有時我兵
暇日多而浙又布帛米魚蓋所從出衣
食易辦乃其兵必餉以九錢差足給俯
仰稍議減輒不足而輕犯法遼無險阻
限虜虜馬若飄風驟雨日夜可猝至我
兵禦之其勞甚而日有鋒鏑死亡之憂
又布米貴重衣食常不給至忍饑寒禦
虜爭為先登數有功而其餉曾不能得

浙之半明知其薄而至死無怨言臣故曰遼左將士人人皆忠臣也

一各營家丁頭目每名人馬月各支銀六錢五分歲領賞銀九錢如遇征防出百里外人得支行糧日一分五厘遇賊對敵者全支遠戍者半支或以乏餉則不與馬不復支行料今止議廣寧正兵營家丁頭目人馬各加至九錢差足比於直浙閩廣之餉而尚不敢望薊之募兵其各營家丁頭目人馬槩議加銀五分各得

銀七錢差足比於宣大之腹裏

一正兵營選鋒軍凡屬河東河西錦義寧前選調者有一年一更之例糧賞隨各原衛造支而人馬月支廣寧行糧料草銀共九錢如遇征防雖適千里不復支行糧料草今止議人馬共加銀三錢

一全遼各營軍士每名月支餉銀四錢歲領賞銀九錢若征調出百里外人馬得支行糧料日三分或半支或不與今止議軍餉月加銀一錢共五錢

一墩軍夜不收處極衝者每名月支餉銀五錢
次衝者每名月支餉銀四錢歲俱領賞
銀九錢今止議槩加銀一錢極衝者六
錢次衝者五錢

一河西馬給料八箇月月給銀一錢八分惟廣
寧四衛老哨諸軍之馬仍給草四箇月
月給銀一錢五分其餘皆無草今未敢
議加

一河東馬給料六箇月月給銀一錢八分餘月
皆無草今未敢議加

有正長考言
一、金州管半糧半賞軍士月支餉銀一錢二分
五釐歲領賞銀四錢五分今止議月餉
加至二錢五分歲賞加至九錢

一、蓋復二衛議添將領練兵三千七百名每兵
一名止議月餉二錢五分歲賞九錢馬
議料六箇月從河東馬之例蓋以金復
蓋三衛在遼猶稱腹裏故兵餉不過舉
先年二錢五分之例而尚不敢比於今
之四錢視宣大腹裏軍餉七錢者不過
三分之一耳

一全遼軍餉皆薄甚而獨於正兵營家丁議之
稍厚者以其最勞苦而功多且有更番
攀報之累累及全遼厚家丁而免攀報
實所以惠全遼而培其元氣也是以急
也諸軍則仍從其薄而不敢槩焉厚望
者恐難計臣也